

**BOSNA I HERCEGOVINA**

**Federacija Bosne i Hercegovine**

**Agencija za reviziju privatizacije u Federaciji Bosne i Hercegovine**

**PLAN RADA**

**Agencije za reviziju privatizacije u Federaciji Bosne i Hercegovine  
za 2018. godinu**

**Sarajevo, januar 2018. godine**

## SADRŽAJ

<b>1. UVOD</b> .....	<b>3</b>
<b>2. NADLEŽNOSTI AGENCIJE</b> .....	<b>4</b>
<b>3. RUKOVOĐENJE I ORGANIZACIJA AGENCIJE ZA REVIZIJU PRIVATIZACIJE U FEDERACIJI BOSNE I HERCEGOVINE</b> .....	<b>4</b>
3.1 Rukovođenje.....	5
3.1.1 Sektor za reviziju privatizacije privrednih društava .....	5
3.1.2 Sektor za reviziju privatizacije banaka .....	5
<b>4. STRATEŠKI CILJEVI</b> .....	<b>6</b>
<b>5. ZADACI I OSTVARENJE ZADATAKA AGENCIJE ZA REVIZIJU PRIVATIZACIJE</b> .....	<b>6</b>
5.1 Zadaci Agencije za reviziju privatizacije .....	6
5.2 Ostvarenje zadataka.....	7
5.3 Kriteriji za ocjenu postupaka privatizacije.....	7
5.4 Realizacija plana rada za 2017. godinu .....	8
5.5 Plan rada za 2018. godinu .....	8
5.6 Faze i planirani tok revizije .....	10
5.7 Rezultati i izvještavanje .....	11
<b>6. ZAKLJUČAK</b> .....	<b>12</b>

Na osnovu člana 6. stav (3) tačka b. Uredbe o osnovama organizacije i načinu poslovanja Agencije za reviziju privatizacije u Federaciji Bosne i Hercegovine („Sl.novine F BiH“, br. 16/14, 58 /14, 75/14), te na osnovu člana 11. i 13. Statuta Agencije za reviziju privatizacije u Federaciji Bosne i Hercegovine („Sl.novine F BiH“, br. 76/14 i 91/14), direktor Agencije za reviziju privatizacije u Federaciji Bosne i Hercegovine, donosi:

**PLAN RADA**  
**Agencije za reviziju privatizacije u Federaciji Bosne i Hercegovine**  
**za 2018. godinu**

**1. UVOD**

Agencija za reviziju privatizacije u Federaciji Bosne i Hercegovine (u daljem tekstu: Agencija) nezavisno je i samostalno tijelo čiji je primarni zadatak obavljanje revizije privatizacije u skladu sa odredbama Zakona o reviziji privatizacije državnog kapitala u privrednim društvima i bankama („Službene novine Federacije BiH“ broj 55/12) i Zakona o reviziji institucija u Federaciji Bosne i Hercegovine („Službene novine Federacije BiH“, br 22/06). Agencija za reviziju privatizacije u okviru svoje nadležnosti ima javna ovlaštenja za donošenje pojedinačnih upravnih akata u skladu sa Zakonom o upravnom postupku („Službene novine Federacije BiH“, br. 2/98 i 48/99). U tom smislu, jasno je određena vizija, misija i ciljevi djelovanja Agencije.

**Vizija** Agencije je djelotvorno izvršiti reviziju privatizacije u Federaciji Bosne i Hercegovine na efikasan i efektivan način te doprinjeti povećanju opšteg i zajedničkog dobra provjerom zakonitosti u procesu privatizacije državne svojine.

**Misija** Agencije je osigurati da se na profesionalan i učinkovit način te u skladu sa međunarodno priznatim standardima revizije i najboljim praksama u EU provede revizija privatizacije kako bi se utvrdio naknadi proces ispitivanja i ocjene ispravnosti procesa privatizacije privrednih društava i banaka u Federaciji Bosne i Hercegovine. Agencija će pomoći tržištu da funkcioniše bolje, i to učinkovitom provedbom revizije privatizacije. Povećanje razine vladavine prava na području revidiranih procesa i sagledavanja cjelokupnog procesa privatizacije bit će posljedica našeg djelovanja.

**Cilj** Agencije je osigurati da se na učinkovit način ispita i ocjeni da li je proces privatizacije izvršen na odgovarajući način i u skladu sa zakonskim procedurama te da li je nakon izvršene privatizacije u privrednim društvima i bankama došlo do povrede ugovorenih prava i obaveza.

**Uloga** Agencije je omogućiti javnosti da na transparentan način prezentira cjelokupan presjek izvršene privatizacije u cjelokupnom obimu te da da doprinos razvoju BiH društva kroz uspostavu provjere procesa privatizacije i utvrdi nepravilnosti prilikom istih, a isto tako prezentira i one privatizacije koje su uspješno provedene.

**Pouzdanost, učinkovitost i kredibilitet** revizije privatizacije bit će vrijednosti Agencije.

## 2. NADLEŽNOSTI AGENCIJE

Revizija privatizacije državnog kapitala u privrednim društvima i bankama provodi se sa ciljem zaštite prava građana utvrđenih Ustavom Federacije Bosne i Hercegovine državne svojine u procesu privatizacije u Federaciji Bosne i Hercegovine i javnog interesa.

Revizija privatizacije tretirat će i stvari i prava sa pripadajućim kapitalom privrednih društava (privatiziranih i ne privatiziranih) koja nisu pod kontrolom te nisu bila uključena u aktivni podbilans, a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja i obaveze prema pravnim licima iz država nastalih raspadom bivše Socijalističke Federativne Republike Jugoslavije.

Revizija privatizacije državnog kapitala u privrednim društvima i bankama uključivat će i raspolaganje novčanim sredstvima ostvarenim prodajom privrednih društava i banaka.

Revizija privatizacije, prema Zakonu, provodi se u privrednim društvima i bankama čiji je državni kapital privatiziran ili se privatizuje u skladu sa odredbama Okvirnog Zakona o privatizaciji preduzeća i banaka u Bosni i Hercegovini („Službeni glasnik BiH“, br. 14/98, 12/99, 14/00, 16/02 i 88/05), Zakona o privatizaciji preduzeća („Službene novine Federacije BiH“, br. 27/97, 8/99, 32/00, 45/00, 54/00, 27/01, 61/01, 27/02, 33/02, 28/04, 44/04, 42/06 i 4/09), Zakona o privatizaciji banaka („Službene novine Federacije BiH“, br. 12/98, 29/00, 37/01 i 33/02), Zakona o početnom bilansu stanja preduzeća i banaka („Službene novine Federacije BiH“, br. 12/98, 40/99, 47/06, 38/08 i 65/09) i Zakona o vlasničko – pravnim odnosima („Službene novine Federacije BiH“, br. 6/98 i 29/03).

Revizija pretvorbe vlasništva provodit će se u privrednim društvima gdje je pretvorba izvršena prije donošenja Zakona o privatizaciji preduzeća.

Postupci revizije privatizacije određeni su INTOSAI - revizijskim standardima te Kodeksom profesionalne etike revizora i drugim propisima koji uređuju pravila i metodologiju rada Agencije.

## 3. RUKOVOĐENJE I ORGANIZACIJA AGENCIJE ZA REVIZIJU PRIVATIZACIJE U FEDERACIJI BOSNE I HERCEGOVINE

Organizacija, upravljanje i rukovođenje Agencijom uređuje se, Uredbom Vlade Federacije BiH, Statutom i drugim općim aktima u skladu sa Zakonom.

Ovlasti direktora, poslovi stručnih službi i ostala pitanja vezana uz organizaciju, upravljanje i rukovođenje radom Agencije, detaljno su razrađeni pravilnicima i drugim aktima kao što je unutrašnja organizacija, sistematizacija radnih mjesta i druga pitanja koja se odnose na radne odnose i funkcionisanje Agencije.

### **3.1 Rukovođenje**

Direktor Agencije predstavlja i zastupa Agenciju, rukovodi radom Agencije i odgovoran je za njen rad.

Agencija ima svojstvo pravnog lica.

Sjedište Agencije je u Sarajevu, Ustanička br. 11.

Agencija ima pečat i štambilj.

#### **3.1.1 Sektor za reviziju privatizacije privrednih društava**

U Sektoru za reviziju privatizacije privrednih društava obavljaju se poslovi naknadnog procesa ispitivanja i ocjena ispravnosti procesa privatizacije privrednih društava koji obuhvata: postupke i pismena Vlade Federacije Bosne i Hercegovine, Agencije za privatizaciju, Federalnog ministarstva finansija, Komisije za vrijednosne papire i Registra vrijednosnih papira, kao i odluke i postupke drugih organa Federacije Bosne i Hercegovine i kantona; procedure u pripremi i provedbi privatizacije privrednih društava, dokumente (poslovne i knjigovodstvene isprave), poslovne knjige i računovodstvene iskaze/finansijske izvještaje; finansijske i računovodstvene transakcije koje se odnose na privatizaciju privrednih društava; način raspolaganja novčanim sredstvima ostvarenim prodajom privrednih društava; zaključene ugovore o privatizaciji i vjerodostojnu dokumentaciju o izvršavanju ugovorenih obaveza; identifikaciju stvari, prava, potraživanja i obaveza iz pasivnog podbilansa i način raspolaganja sa njom (stvari i prava sa pripadajućim kapitalom privrednih društava, privatiziranih i neprivatiziranih koja nisu pod kontrolom te nisu bila uključena u aktivni podbilans, a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja i obaveze nastale do 31.03.1992. godine prema pravnim licima iz država nastalih raspadom bivše Socijalističke Federativne Republike Jugoslavije); promjenu obavljanja djelatnosti privrednih društava suprotno uvjetima iz ugovora o prodaji; promjenu imena ili prestanak rada privrednog društva suprotno ugovoru o privatizaciji.

#### **3.1.2 Sektor za reviziju privatizacije banaka**

U Sektoru za reviziju privatizacije banaka obavljaju se poslovi naknadnog procesa ispitivanja i ocjena ispravnosti procesa privatizacije banaka koji obuhvata: postupke i pismena Vlade Federacije Bosne i Hercegovine, Agencije za privatizaciju, Agencije za bankarstvo, Federalnog ministarstva finansija, Jedinice za privatizaciju banaka, Komisije za vrijednosne papire i Registra vrijednosnih papira, kao i odluke i postupke drugih organa Federacije Bosne i Hercegovine i kantona; procedure u pripremi i provedbi privatizacije banaka, dokumente (poslovne i knjigovodstvene isprave), poslovne knjige i računovodstvene iskaze/finansijske izvještaje; finansijske i računovodstvene transakcije koje se odnose na privatizaciju banaka; način raspolaganja novčanim sredstvima ostvarenim prodajom banaka; zaključene ugovore o privatizaciji i vjerodostojnu dokumentaciju o izvršavanju ugovorenih obaveza; identifikaciju stvari, prava, potraživanja i obaveza iz pasivnog podbilansa i način

raspolaganja sa njom (stvari i prava sa pripadajućim kapitalom banaka, privatiziranih i neprivatiziranih koja nisu pod kontrolom te nisu bila uključena u aktivni podbilans a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja i obaveze nastale do 31.03.1992. godine prema pravnim licima iz država nastalih raspadom bivše Socijalističke Federativne Republike Jugoslavije); promjenu obavljanja djelatnosti banaka suprotno uvjetima iz ugovora o prodaji; promjenu imena ili prestanak rada banke suprotno ugovoru o privatizaciji.

#### **4. STRATEŠKI CILJEVI**

Agencija je, u okviru svojih zakonskih ovlasti i obaveza učinkovitog i brzog izvršavanja povjerenih joj zadataka, utvrdila tri ključna strateška cilja koja će joj pomoći u realizaciji ostvarenja njezinih ciljeva:

<b>Strateški ciljevi</b>		
<b>1</b>	<b>2</b>	<b>3</b>
Uposliti revizorsko i administrativno osoblje koje ispunjava uslove za obavljanje poslova iz njene nadležnosti, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije.	Izvršiti profesionalno i odgovorno proces revizije privatizacije privrednih društava i banaka za navedenu godinu spram finansijskih sredstava i raspoloživosti ljudskih resursa, a u skladu sa Zakonom o reviziji privatizacije državnog kapitala u privrednim društvima i bankama.	U toku revizije privatizacije, a u skladu sa zakonskim obavezama, izvještavati Vladu FBiH, Parlament Federacije BiH i cjelokupnu javnost o procesima revizije u vidu izvještaja (polugodišnjih, godišnjih i završnog izvještaja).

#### **5. ZADACI I OSTVARENJE ZADATAKA AGENCIJE ZA REVIZIJU PRIVATIZACIJE**

##### **5.1 Zadaci Agencije za reviziju privatizacije**

Zadaci Agencije za reviziju koji proizlaze iz Zakona o reviziji privatizacije državnog kapitala u privrednim društvima i bankama i Zakona o reviziji institucija u Federaciji Bosne i Hercegovine su:

- provesti reviziju privatizacije u subjektima koji su određeni članom 5. Zakona o reviziji privatizacije;
- utvrditi da li je u postupku pretvorbe i privatizacije došlo do povrede odredbi Zakona o privatizaciji, Zakona o državnom kapitalu ili posebnih zakona;
- Agencija za reviziju dužna je najmanje jedanput godišnje Vladi Federacije Bosne i Hercegovine podnijeti izvještaj o vršenju povjerenih javnih ovlaštenja (član 9. stav 3. Zakona);
- Agencija za reviziju dužna je svakih šest mjeseci, putem Vlade Federacije Bosne i Hercegovine, informisati Parlamentarnu komisiju Federacije Bosne i

Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine. (član 13. Zakona);

- Izvještaj o izvršenju programa rada za prethodnu godinu Agencija je dužna dostaviti Parlamentu Federacije Bosne i Hercegovine najkasnije do 30. marta tekuće godine (član 14. stav 2. Zakona);
- dati mišljenje kojim će se potvrditi ispravnost provedbe pretvorbe i privatizacije u slučajevima kada se revizijom utvrdi da su postupci pretvorbe i privatizacije provedeni u skladu sa zakonom i drugim propisima (član. 17. stav 1. Zakona);

## **5.2 Ostvarenje zadataka**

Ostvarenje planiranih zadataka izvršit će se u skladu sa Zakonom, a oni se odnose na zaštitu prava građana utvrđenih Ustavom Federacije Bosne i Hercegovine državne svojine u procesu privatizacije u FBiH i javnog interesa zaštićenih vrednota, ukupnog pravnog poretka, javnog morala te postizanja ciljeva propisanih odredbama člana 4. Zakona o reviziji privatizacije na način da se utvrdi je li u postupku privatizacije došlo do povrede odredbi Zakona o privatizaciji.

## **5.3 Kriteriji za ocjenu postupaka privatizacije**

Kriteriji za ocjenu postupaka privatizacije određeni su Zakonom o privatizaciji preduzeća („Službene novine Federacije BiH,“ br. 27/97, 8/99, 32/00, 45/00, 54/00, 61/01, 27/02, 33/02, 28/04, 44/04, 42/06 i 4/09), te drugim zakonskim propisima.

Pri utvrđivanju kriterija za ocjenu postupaka privatizacije koristit će se dokumentacija koju su privredna društva i banke bila obvezna dostaviti Agenciji za privatizaciju u Federaciji BiH i kantonalnim agencijama.

To su sljedeći dokumenti:

- odluka o pretvorbi privrednog društva ili banke;
- elaborat o procjeni vrijednosti privrednog društva ili banke;
- kupoprodajni ugovor;
- razvojni program,
- osnovni podaci o privrednom društvu ili banci,
- dokazi o pravu vlasništva ili pravu korištenja nekretnina,
- vrijednost i način raspolaganja imovinom iz pasivnog podbilansa;
- izvještaj o realnosti podataka iskazanih u finansijskim izvještajima za godinu koja prethodi godini u kojoj se obavlja procjena vrijednosti poduzeća,
- druga dokumentacija koja se odnosi na privatizaciju pojedinog privrednog društva ili banke.

Uz spomenutu dokumentaciju, važan akt, kod utvrđivanja kriterija za ocjenu postupaka pretvorbe i privatizacije je i potvrda ili rješenje Agencija za privatizaciju, kojom se

privrednom društvu daje saglasnost na namjeravanu privatizaciju. Pri donošenju ocjene korišteni su i drugi propisi koje je donijela Agencija ili neka druga državna institucija, a odnose se na proces privatizacije.

Procjene Agencije su da je za jedan revizorski izvještaj sa svim kompletnim zakonskim procedurama potrebno u prosjeku tri mjeseca da se izvrši revizija u privrednom društvu ili banci s tim da će se revizija vršiti u planiranoj dinamici paralelno u više privrednih društava i u skladu sa brojem revizora u Agenciji.

#### **5.4 Realizacija plana rada za 2017. godinu**

U skladu sa postojećim brojem zaposlenih u Agenciji za reviziju privatizacije u FBiH, Agencija je planom rada za 2017. godinu, planirala izvršiti 14 (četrnaest) revizija privatizacije u privrednim subjektima i reviziju privatizacije 4 (četiri) banke.

U Agenciji tokom prve polovine 2017. godine, radilo je 6 (šest) revizora na planiranim revizijama. U drugoj polovini godine, jedan revizor ekonomske struke je prestao sa radom. Na ispunjavanju Plana rada radilo je 5 (pet) revizora, jer navedeno radno mjesto je ostalo nepopunjeno, iako su bila raspisana dva konkursa, na kojim nije bilo prijava za navedenu poziciju.

Od planiranih 14 privrednih društava planom rada za 2017. godinu, otvorena je revizija u 10 (deset) privrednih društava kao i jedno privredno društvo koje nije bilo obuhvaćeno planom rada, a po urgenciji iz ureda Premijera FBiH, Agencija je otvorila i tu reviziju privatizacije.

Kada se radi o revizijama privatizacije banaka, možemo konstatovati da je Plan rada za 2017. godinu u potpunosti realiziran, jer su uspješno okončane 4 (četiri) planirane revizije privatizacije banaka.

S obzirom na okolnosti i sve poteškoće s kojima se u toku rada Agencija susreće, Plan rada za 2017. godinu je u procentima iskazano realiziran 80% s tim da je za dva privredna društva privremeno obustavljena revizija zbog neustupanja tj., nedostavljanja dokumentacije potrebne kako bi se kompletirao revizorski izvještaj i na bazi njega donijelo adekvatno rješenje. Agencija je po ovom pitanju informirala Vladu Federacije Bosne i Hercegovine, a isto tako prosljedila cjelokupnu korespondenciju nadležnim tužilaštvima na daljnje postupanje.

#### **5.5 Plan rada za 2018. godinu**

Planom rada za 2018. godinu, planirano je ukupno 11 (jedanaest) revizija. Od toga 6 (šest) revizija privatizacije privrednih društava i 5 (pet) revizija privatizacije banaka. Plan rada za 2018. godinu koncipiran je na bazi trenutno realnih mogućnosti Agencije za izradu Izvještaja i donošenja Rješenja o provedenoj reviziji privatizacije. Također, broj uposlenih revizora je nedovoljan da bi se u većem obimu radile revizije privatizacije. U planu za ovu godinu potrebno je uposliti jednog revizora ekonomske struke, za kojim je u toku prošle godine ostala upražnjena pozicija jer je raniji revizor napustio Agenciju



zbog drugog zaposlenja. Isto tako, na osnovu ranijeg iskustva, ostavljen je i prostor za eventualni urgentni predmet da li iz tužilaštva ili neke druge institucije prilikom kojeg se traži postupanje Agencije.

U slijedećoj tabeli daje se prikaz subjekata revizije plana rada za 2018. godinu za privredna društva:

Redni broj	Subjekti revizije privatizacije	Opis
1	FAMOS D.D. SARAJEVO	Izvršiti reviziju privatizacije za navedeni privredni subjekat po zahtjevu Kantonalnog tužilaštva KS
2	NIGMA D.D. BUSOVAČA	Izvršiti reviziju privatizacije za navedeni privredni subjekat po zahtjevu Općinskog javnog pravobranilaštva Vitez
3	UNIS LASTA D.D. SARAJEVO	Izvršiti reviziju privatizacije za navedeni privredni subjekat po zahtjevu Vlade Federacije BiH
4	POLIHEM D.D. TUZLA	Izvršiti reviziju privatizacije za navedeni privredni subjekat po zahtjevu Udruženje dioničara
5	LASTA D.D. ČAPLJINA	Zakon o reviziji privatizacije privrednih društava i banaka
6	SANITEX D.D. VELIKA KLADUŠA	Vlada FBiH (po dopisu općinskog vijeća Općine Velika Kladaša)
<b>Ukupno</b>	<b>2018. godina</b>	<b>6 (šest) privrednih subjekata</b>

U slijedećoj tabeli daje se prikaz subjekata revizije plana rada za 2018. godinu za banke:

Redni broj	Subjekti revizije privatizacije	Opis
1	UNA BANKA D.D. BIHAĆ	Zakon o reviziji privatizacije privrednih društava i banaka
2	GOSPODARSKA BANKA MOSTAR	Zakon o reviziji privatizacije privrednih društava i banaka
3	VAKUFСКА BANKA D.D. SARAJEVO	Zakon o reviziji privatizacije privrednih društava i banaka

<b>4</b>	POSAVSKA BANKA D.D. ORAŠJE	Zakon o reviziji privatizacije privrednih društava i banaka
<b>5</b>	UNIVERZAL BANKA D.D. SARAJEVO	Zakon o reviziji privatizacije privrednih društava i banaka
<b>Ukupno</b>	<b>2018. godina</b>	<b>5 (pet) banaka</b>

### 5.6 Faze i planirani tok revizije

Postupci revizije privatizacije započinju prikupljanjem dokumentacije potrebne za proces revizije. Kako su u postupcima privatizacije, osim privrednih društava i banaka koja su bila predmet privatizacije, izravno ili neizravno sudjelovale i brojne pravne i fizičke osobe te tijela državne uprave, kao i osobe s javnim ovlastima, tako će se i dokumentacija za provedbu revizije prikupljati kod svih navedenih subjekata. Najveći dio podataka i dokumenata pribavit će se od Federalne Agencije za privatizaciju i kantonalnih agencija za privatizaciju, Agencije za bankarstvo, zatim kod privrednih društava i banaka kod kojih će se obaviti revizija, te od ostalih relevantnih institucija i organa koji su učestvovali u procesima privatizacije.

Najvažniji podaci i dokumenti u privrednim društvima i bankama kao i u organima i institucijama za privatizaciju na osnovu kojih će se obaviti revizija bit će:

- knjigovodstvena vrijednost državnog kapitala prema početnom bilansu stanja privrednih društava i banaka,
- promjene koje su nastale na kapitalu kao i druge materijalno značajne promjene na imovini i obavezama, od dana utvrđivanja početnog bilansa stanja do dana privatizacije i od dana privatizacije do dana završetka revizije,
- vrijednost i način raspolaganja imovinom iz pasivnog podbilansa od strane privrednog društva i drugih subjekata,
- ispunjavanje ugovornih obaveza od strane kupca definiranih ugovorom o prodaji državnog kapitala,
- da li su od dana pokretanja do okončanja procesa privatizacije aktivnosti nadležnih nositelja procesa privatizacije i kupca bile u skladu sa važećim propisima.

Također će se u procesu revizije privatizacije pored navedenih dokumenata tražiti i slijedeća dokumentacija:

- dokumentacija o pretvorbi vlasništva u privrednim društvima gdje je pretvorba izvršena prije donošenja Zakona o privatizaciji preduzeća;
- odluka organa upravljanja o pretvorbi sa svim obaveznim priložima;
- rješenja ili suglasnosti Agencija (Agencija za privatizaciju);
- zapisnik s osnivačke skupštine;
- statut (sa svim izmjenama i dopunama, s datumima primjene izmjena i dopuna);
- rješenja suda o upisu u sudski registar;

- podaci o dionicama (broj, nominalna vrijednost, serija, vrsta, rod) ili udjelima;
- ugovori o kupnji dionica, odnosno udjela na osnovu kojih je izvršen upis u knjigu dionica ili u knjigu udjela;
- podaci o sticanju vlastitih dionica (odluke skupštine, ugovori ili drugi dokumenti na osnovu kojih su stečene vlastite dionice);
- ugovori o prijenosu dionica, odnosno udjela na temelju kojih su evidentirane;
- promjene u knjizi dionica ili knjizi udjela;
- dokumentacija o dokapitalizaciji (ugovori, odluke skupštine, virmanski nalozi o uplatama gotovine, procjena vrijednosti imovine koja se unosi);
- dokumentacija o pretvaranju potraživanja u udjel (odluka, pravno utemeljenje potraživanja, ugovor o pretvaranju potraživanja u ulog i mišljenje komercijalne revizije);
- knjiga dionica ili knjiga udjela sa svim promjenama;
- popis članova uprave, upravnih i nadzornih odbora, s datumima imenovanja i razrješenjima;
- ugovori o prodaji nekretnina, zajedno s odlukama nadležnih tijela;
- podaci o zahtjevima prijašnjih vlasnika za povrat imovine koja se nalazi u imovini društva;
- izvještaji revizorskih kuća i interne revizije;
- analitička evidencija dugotrajne imovine za sve godine od pretvorbe, uključujući podatke o smanjenju vrijednosti i amortizaciji;
- analitička evidencija kupaca i dobavljača za sve godine od pretvorbe;
- popis privrednih društava u kojima je društvo nastalo pretvorbom ili većinski vlasnik ima vlasnički ili suvlasnički udjel, te dokumenti, evidencije i finansijski izvještaji potrebni za provedbu revizije osnivanja i revizije poslovanja za sva navedena privredna društva i banke.

## **5.7 Rezultati i izvještavanje**

Na osnovu prikupljenih podataka, izvršenih analiza i procjene revizije po fazama njenoga provođenja, utvrđuju se sve značajne činjenice vezane za reviziju privatizacije subjekata (privrednih društava i banaka) nakon čega se donosi rješenje o provedenoj reviziji privatizacije.

Po donošenju Rješenja pristupa se izradi izvještaja o obavljenoj reviziji pretvorbe i privatizacije. Metodološki, svi izvještaji biti će sastavljeni na istovjetan način i u pravilu će se sastojati od šest dijelova.

*U prvom dijelu* je navedena zakonska regulativa na osnovu koje je privredno društvo ili banka trebalo obaviti pretvorbu i privatizaciju.

*U drugom dijelu* navode se osnovni podaci o poslovanju privrednog društva u vrijeme pretvorbe, podaci o statusnim promjenama koje su nastale u razdoblju od pretvorbe

privrednog društva do dana obavljanja revizije, te podaci o vlasnički povezanim društvima.

*U trećem dijelu* opisan je postupak pretvorbe sa svim nepravilnostima koje su revizijom utvrđene.

*Četvrti dio* izvještaja se odnosi na reviziju postupaka privatizacije, a obuhvata sve promjene vlasničke strukture nastale nakon pretvorbe privrednog društva, dokapitalizaciju, sanaciju i stečaj društva.

*U petom dijelu* izvještaja prezentirati će se podaci o poslovanju društva i vlasničkoj strukturi u vrijeme obavljanja revizije.

*U šestom dijelu* izvještaja, a nakon provedenog postupka i na temelju utvrđenih činjenica i prikupljenih dokaza u procesu revizije privatizacije, a prije završetka konačnog revizorskog izvještaja, Agencija priprema nacrt izvještaja o reviziji kojeg dostavlja upravi privrednog društva ili banke na komentar.

Nakon razmotrenih komentara uprave privrednog društva, banke ili rukovodioca organa, organizacije i institucije, odnosno prije pripreme konačnog izvještaja i u slučajevima neslaganja, u konačan izvještaj, Agencija će uključiti njihove relevantne komentare i dati revizorsko mišljenje o provedenoj reviziji privatizacije privrednih društava i banaka.

Pojedinačni izvještaji bit će sastavljeni u skladu s odredbama Zakona o reviziji privatizacije i pravilima revizorske struke, sadržavat će sve značajne podatke na osnovu kojih su ocijenjeni postupci pretvorbe i privatizacije. Također, izvještaji će sadržavati podatke o osobama koje su bile odgovorne za provedbu privatizacije, nazive pravnih osoba ili imena fizičkih osoba koje su obavile procjenu vrijednosti preduzeća, imena osoba odgovornih za utvrđene nepravilnosti, te vlasničku strukturu u vrijeme privatizacije i u vrijeme obavljanja revizije. U izvještaju će biti navedena i vlasnički povezana društva, kao i zakonski zastupnici u tim društvima.

## **6. ZAKLJUČAK**

Početak rada Agencije kao i njena uloga od strane Vlade Federacije Bosne i Hercegovine ima važnu ulogu u ostvarenju ciljeva ulaska u evropske integracije. Zbog toga je osim nastojanja Agencije da izvrši sveobuhvatnu reviziju privatizacije na profesionalan i odgovoran način, neophodna podrška sveukupne javnosti koja će Agenciju osnažiti u provođenju postupaka njenog rada.

Proces revizije privatizacije izuzetno je složen, multidiscipliniran i zahtjeva ogromnu koncentraciju u radu. Jedino snažnim zalaganjem, a baziranim na činjenicama, te transparentnošću postupka, može se doprinjeti razumijevanju ovog procesa.

Bitno je naglasiti da će rezultati rada Agencije ovisiti i od pravnog okruženja i provođenja aktivnosti nadležnih institucija po izvještajima o provedenoj reviziji privatizacije.

Agencija je transparentna u svom radu, otvorena za sve institucije i stručnu javnost, te se očekuje da će se uspješan rad Agencije za reviziju privatizacije i strateški ciljevi i prioriteta nastaviti i u nastupajućem razdoblju.

Broj: 01-05-1-42/18

Sarajevo, 16.01.2018. godine

**DIREKTOR**

Vedad Duraković, dipl.oec.